

# "YoupalTubo" e "Tic e Tac Furlan" a conquistin il web

*I gnûfs canâi social dai zovins furlans a son rivâts a scuasit 3 milions di visualizacions*

Al cres une di daûr chê altre Al sucès dai social sostignûts de ARLeF cun protagoniscj i zovins. O fevelin di YoupalTubo, là che vot fantats furlans fra i 20 e i 28 agns - Lucia Bello, Federico Benedet, Davide Buccheri, Mattia Cantarutti e Federico Iob (Chei di Udin), Francesco Colombino, Diego Scarsini e Fabio Valvason - a contin su YouTube lis lôr passions, indreçantsi ai coetanis ma no dome, cun videos là che culture, grafiche, nature e lenghe si colorin di ironie e lizerece.

E si fevele ancje di Tic e Tac Furlan, il canâl TikTok cun protagoniste Greta Fabbro e lis sôs "pirulis" di marilenghe, mini lezioni di furlan fatis cun videos simpatics di un minût. Lis dôs iniziatis, in rêt dome di cualchi mês incà, a àn za numars di influencers. YoupalTubo al à cuasi 7 mil iscripts, pal plui inte fasce 18-34 agns. A son plui di 295 mil lis visualizacions totâls, cun videos che a van a la grande in ognidun dai formats tematics dal canâl, cemût che a dimostrin ancje lis iterazioni: "Geo&Nature", "Sbisiâ cu la grafiche", "Furlan Adventures", "Detulis e peraulis furlanis", "Chê storie" e "Quiz mortale", (che al è a cuote 51 mil visualizacions). No son mancul interessants i numars di Tic e Tac Furlan, graciis ancje ae aiutante pelose di Greta, la gjate brasiliane Preta, coprotagoniste dal format "Impare cu la gjate".

Il canâl TikTok al à passât i 7 mil followers, i "mi plâs" a son plui di 62 mil, lis visualizacions plui di 2 milions e mieç. Cemût che al à rimarcât il president de ARLeF **Eros Cisilino** in ocasion de partence des dôs iniziatis, a son progjets «li che o crodin tant. Lis zovinis gjenerazioni a amin la lenghe furlane. Par rivâ ai fantats però al è fundamentâl doprâ i canâi

social di comunicazion cuotidiane e cjapâju dentri stiçant lis lôr passions».

YoupalTubo e Tic e Tac Furlan a mostrin di vê centrât l'obietîf, a apassionin i zovins passant i confins

gjeografics, i pregiudizis linguistics e sburtant la lôr voie di fevelâ, scoltâ e divertîsi in marilenghe. Cemût che a disin i magnifics vot di YoupalTubo, "Ce spietistu? Frache il poleâr e iscriviti al canâl!"



## Cun Maçalizi e Rosada! il furlan al è protagonist a Mittelfest 2022

Ancje chest an la ARLeF si conferme presince impuartante dal Mittelfest cul spettacul teatrâl "Maçalizi - Il dio del massacro", coprodut intune cul stes festival e cul CSS Teatri stabil di inovazion F-VJ.

Comedie de dramaturghe Yasmina Reza, diventade famose intal 2011 cul film Carnage di Polanski, "Il dio del massacro" - in ocasion de XXXI edizion de rassegne - al devente "Maçalizi". In sene, a Cividât, intal Claustri di Sant Francesc, Fabiano Fantini, Massimo Somaglino, Aida Talliente e Rita Maffei, che e je ancje regjiste a cuatri mans cun Fabrizio Arcuri. La traduzion in lenghe furlane e je di William Cisilino e Michele Calligaris.

Il spettacul ROSADA!, une produzion dal Teatri Stabil Furlan in colaborazion cu la ARLeF, Argot Produzioni e Mittelfest 2022, al indaghe invezit - midiant des Poesie a Casarsa di Pier Paolo Pasolini - il colegament tra la peraule e la bisugne di tramandâle, e al resone sui confins tra tiere e lenghe, tra apartignince e distac, tra mont contadin e leterature. Si scuvierç cussì un Pasolini inedit, compagnâts de partecipazion straordenarie dal musicist Paolo Fresu, de vôs di Nicola Ciaffoni, dal cjant di Elsa Martin e des sonorizacions di Giulio Ragno Favero. Dramaturgjie e regjie a son di Gioia Battista, di une idee di Caraboa Teatro.